

四庫全書

史部

欽定四庫全書

兩朝綱目備考卷十

寧宗

開禧三年丁卯春正月丁丑朔邱寯罷

案是年凡倪胄事本傳俱作四年誤

以張巖代之初小使既為金人所却還寯復乞朝廷

移書金帳以續前議又謂金人指太師平章為元謀

若移書乞暫免繫銜韓侂胄大怒故寯遽罷寯道遇

所遣使臣皇甫恭自汴京回言行省完顏弼右副元

帥赫舍哩子寧皆有和意邱宓之罷江淮督視也命
由中出執政不知之李壁諫侂冑不納壁曰凡舉大
事未論行事之是非先觀人心之向背邱宓鄉有人
望奈何去之侂冑變色曰方今天下只有一邱宓耶
因拂衣而起

已卯吳曦下白榜於四路

偽四川都轉運使徐景望入利州總領官劉智夫為
所逐後二日曦遣推鋒軍統制祿禧以兵千五百

戊萬州曦僭位二月丁巳自重慶引兵入夔州

命張巖督視江淮軍馬

代邱室也開府維揚

癸未金人陷階州

三月壬辰興州將劉昌國引所部兵至州金人始去
丁亥皇子圻生

二月己未詔禮官討論合行典禮禮官請用熙寧九年故事奏告天地宗廟社稷高禩諸陵攢官太師宰

臣率百寮拜表稱賀從之癸亥薨追封順王謚曰冲懷

庚寅遣淮民歸業

詔建康府給裝錢後四日命兩淮帥守監司招集流民

卒郊楊震仲飲藥死

震仲以通判興元府權大安軍事吳曦以僞命招之震仲不屈而死

甲午吳曦僭位於興州下黃榜於四路

以安丙為丞相權行都省事丙稱疾不出 戊戌利

路轉運判官陳咸不受偽命削髮於利州之石鑊案咸

傳作
后鑊

庚子彭輅奔襄陽

先是輅以全州副都統進屯上津

癸卯嚴進引兵入成都

甲辰陳孝慶罷

奪三官

二月戊申雪

楊輔大書開禧年號

輔時為成都府路安撫使下令稱提錢引大書開禧之號以揭之墨榜凡數千計 曦之遺諸貴人書也 輔獨深止之曦不悅再與費士寅書畧云成都侍郎獨不相察使曦不從權濟難就其和議北人深入何以為計相公可為問之蓋費公所答曦書其詞猶婉

而楊公之書其語甚切故也是時四路行移獨成都
安撫一司不去開禧之號其後董鎮誅啟蔭成都得
遺職書藁有云楊侍郎未肯通情云

壬申金人退

始御正殿復膳

甲寅竄商榮

削奪官爵柳州安置

己未吳曦反書聞

程松罷

以四川宣撫遁歸故也

楊輔為四川制置使

自成都府路安撫除以蠟書達之

葉適兼江淮制置使

自沿江制置除

韓侂胄與吳曦書

許以茅土之封書與御札同發侂胄書云伏自正月

十九日辱調雲二字號鈞翰之後此月旦日嘗附庚
牌遞上狀諒以呈達多日不聞動止之詳正切瞻仰
忽傳聞不一深以為疑有如先世勲德之盛中興之
功居第一契丈平日忠誠許國侂冑所深知度必無
是理鈞意或以權宜割地與之連和姑為保全蜀之
計此非排難解紛之舉程樞既凡事背馳已為敷陳
與之祠祿矣萬一虛傳果或有之更望深入鈞慮敵
情難測前事可鑒若恩自上出增光前烈子孫之傳

可與蜀山同其永久豈不偉歟侂胄平昔荷知愛之
厚非他人之比故冒昧言之倘蒙開諾望以首尾曲
折來上當即奏聞繼頒茅土之封顯俟寵報侂胄不
任至望吳曦誅兩日而侂胄之書始至按吳曦誅在
後乙亥日此
目因侂胄寄書
事而終言之當事之初侂胄已置坤維於度外
而捷書奄至都人大喜至今誦之不忘此安觀文之
大功所以不可掩也

不雨

詔大理三衙臨安府決繫囚甲子賑給旱傷州縣貧
民命諸路提刑司從宜斷疑獄辛未禱於天地宗廟
社稷命有司舉行寬卹之政八條蠲兩淮被兵諸州
今年租賦乙亥釋兩浙路杖以下囚三月戊子蠲兩
淮被兵州郡役錢

庚申罷諸路添差冗員

丁卯罷江浙荆湖福建路招軍

甲子董鎮以僞命至成都

鎮鄱陽人曦之客也

戊辰皇子塢生

四月戊申薨追封申王謚曰冲懿

庚午金人去襄陽

乙亥安丙等誅吳曦四川平

先是正月辛丑李好義與其徒謀舉義二月壬戌楊巨源至興州見安丙謀之丙喜明日始出視事辛未鳳州進士楊君玉引楊巨源以見李好義二十六日

壬申巨源介好義以謁安公議遂定君玉退與其鄉人白子申共草密詔而安公潤色之二十八日甲戌巨源書密詔以納安公二十九日乙亥未明好義以所結官軍殺曦于偽官軍士李貴斬曦首巨源尋以義士至君玉宣密詔安丙權宣撫使巨源為參贊軍事淳熙末安丙為文州曹官有薦于吳挺者檄兼利西安撫司簽廳時彭人蘇熙之為安撫司幹辦公事以文墨自許視旁人無如也挺之館客有李姓者

挺子旰之外姻也德壽宮慶典李為之草表以賀表
文中有揚命二字既行矣熙之一日挾尚書以進謂
挺曰導揚末命此顧命中語李何用之挺大驚追之
不及由是李與旰皆恨之未幾趙彥逾來蜀總計舊
例西帥遣蜀官一員往迓則計使舉以京秩熙之既
為旰李所憾乃共薦安公代之彥逾見之甚喜他日
從容謂曰太尉統衆六萬得毋例有虛籍者乎安公
不敢盡言則曰某所若干某所若干以實論之可五

萬三四千人耳居數月彥逾以書來曰太尉忠誠如此盍若損六千人之虛籍寬四川之重賦不亦可乎挺得書謂人曰趙少卿入蜀尚新安得知吾虛實此必安丙告之耳乃大怒盱李共為解遂已未幾丙秩滿入都因為蘇代挺記其前事欲拒之盱李乃言曰使其果有是勢當自疑今調此官以來可亮其無它也安公為人警敏凡事盡力挺更喜之為延譽於諸司改秩而去及曦為殿帥安通判隆慶府又遷知大

安軍比軍興首辟隨軍轉運旋以救荒有緒復遷一
官為朝奉大夫逮其稱王即除丞相長史都省事俄
楊李之議合安公遂決策誅之蓋居不疑之地操可
致之資其勢順也天之祐宋夫豈偶然哉 武興之
變立功者安觀文為主楊巨源李好義倡率忠義
次之李貴手斬逆賊又次之若李好古安癸仲楊君
玉李坤辰張林朱邦寧之徒協謀舉事又其次也立
節者陳待制咸為之首史次秦薰目避偽次之李國

博興宗棄郡而去又次之若王釜李道傳皆不受逆
傳之招又其次也楊泰之鄧性善程遇孫宋之源文
俱家子欽劉端友劉靖之楊汝明張方家大酉楊修
年梁梓唐父中晁子儀錢元儒龐坤載張權鄧諫從
袁桂楊鼎年李莊程公說避偽去官又其次也死節
者一人權大安軍楊震仲始終不奉行偽命者一人
成都帥臣楊輔也其餘拒偽歸朝如劉侍郎甲李校
書臺稱疾不視事如李侍郎寅仲等尚多有之誅

曦及復四川功將士共轉三十萬官資犒賜共用金七十兩金盤盞一副金帶五條金束帶一條銀六十一萬七千七百七十三兩絹六十一萬六千九百二十四匹錢八萬二百五十引 自昔亂蜀者非蜀人如張魯李特劉闢王建孟知祥之類皆北人也本朝王均張信東京人王孝忠蔡州人中間惟饑民王小波以歲荒盜食耳非本有反意也近者吳曦兄弟與其謀主姚淮源米修之皆德順軍人董鎮饒州人方

是時東人有為元帥者為奉使者擢牧者護漕者詳
刑者皆方舟而去而糾合忠義克清大憝挈六十州
之地以還天子者又西人也曦既死凡前日東人之
任悉西人為之自是井絡清夷四方之士稍稍而至
漸復承平之觀矣

三月丁丑誅徐景望

以受偽命入利州逐總領官也

己卯利東帥劉師文帛書至行在

復賜帛書令從長處置

辛巳費士寅誅董鎮於廣都

鎮曦之客傳偽命於成都者也時士寅新知潼川府
未上鎮至廣都為士寅所殺鎮有遺曦書言楊侍郎
未肯通情蓋指楊輔云

丙戌賜安丙帛書

諭以能殺曦報國當不次推賞雖二府之崇亦所不
吝於是曦已誅而朝廷未知也

丁亥趙彥呐誅祿禧於夔州

禧曦之將也避曦嫌名更名祁引兵入夔州為新潼

川府觀察推官趙彥呐所殺

己丑瀘帥李君亮遣間使至行在

就賜費士寅帛書令叶心經理

癸巳復西和州

興州中軍統制李好義復之

丙申命吳玠兼總西事

庚子誅吳曦露布至行在

朝廷大喜 四月丁卯曦函首至行在詔赴都堂審
驗戊辰獻於廟社梟三日先是露布既聞詔侍從兩
省臺諫集議吳曦刑名命四川宣撫司籍曦產尋詔
吳曦妻子論死外其男年十五以下送二廣州軍編
管吳璘子孫移出蜀吳玠子孫免連坐尋詔存吳璘
廟祀追奪曦父吳挺官爵

安丙知興州兼四川宣撫副使

除端明殿學士

楊輔為宣撫制置使兼知成都府

許奕為四川宣諭使

以起居舍人充

竄程松

落資政大學士奪六官筠州居住尋責授順昌軍節

度副使澧州安置

復鳳州

忠義統領張翼復之

辛丑曲赦四川

降雜犯死罪囚釋杖以下

乙巳復黃牛堡

忠義人劉信復之

夏四月戊申吳獵兼四川宣諭使

自湖北京西宣撫使改命 命四川宣撫司察守節

官吏及從偽者具以名聞吳獵德夫之為四川宣諭

也時偽命者尚在州縣而士大夫往往持脅從罔治之說務為閹畧僉謂德夫素有聲且舊從張敬夫游於義利善惡之間講之熟矣是宜翕然以旌別淑慝望之李道傳時在益昌德夫語之曰獵欲捐此曹閹昧之過隱而弗章俾之悔悟因而釋之今但以揚善為先則此曹當愧死矣始德夫及夔門而有制帥之命旋又中格遲留沔州樂飲旬日遂如漢中先以輜重浮嘉陵而下至望雲舟敗凡通犀美玉粟金盃等

之屬往往飄沒焉漢中留餘月復還益昌蓋侂冑許以蜀帥命之故遣人往湖外挈其孥而遲留以俟命耳宣諭月俸如宣撫德夫以丁卯夏初入峽戊辰春末還夔州首尾一年自德夫至賓客吏士共費大軍庫錢近二十萬緡而諸司聘幣不在其數於是陳和甫劾從偽者八人得旨除名編管而副宣撫司奏駁之事下德夫覈實初德夫為湖南筦庫宋若水子淵郎中提點刑獄率諸司共以京秩薦之子淵之子龍

游令之源時權宣司準備差遣馳至益昌營救其事
德夫謂之源吾當檄君往諸州究實君其為諸人道
地事可無它之源曰之源但能導達此意於公若受
檄而行即當以實告耳德夫罔措會朝廷用制置司
奏免馮光弼等三人編管但除名事乃已德夫早為
劉文潛司業幕客又受丞相趙溫叔雄所知文潛死
於謫籍常欲厚報之會溫叔之子昱除知廣安軍久
病不及赴而死文潛之長子坊以病廢其中子堅通

判漢州遇寒疾數日卒德夫欲率宣制二司為奏言
昱暨以逆曦僭叛憂憤至死乞褒贈之源持不可德
夫笑曰君迂濶乃爾不藉是何以報二先生之恩耶
楊輔嗣勲得書亦不從德夫乃與宣撫司同奏追復
文潛集撰職名諡溫叔曰文定德夫留益昌久之不
得命會朝旨召德夫還至夔門居數月侂冑誅死錢
象祖伯同為相力薦嗣勲可大用遂召入卒以德夫
代之

按韓侂冑誅死及吳玠代楊輔嗣蜀皆是年十一月以後事此蓋因叙吳玠事蹟而終言之

德夫始上淑慝之章其所薦以劉光祖舍人為首青
城山道人安世通次之又薦郡守至選人五十餘人
凡四川科目之士及執政侍從監司帥臣子弟親朋
莫有遺者章上得旨人數猥多難以行遣令覈實具
奏後卒不行而所慝者脅從餘黨九人已已春末朝
廷始下其章首尾凡二年諭司所行止此而已及為
蜀帥辟幕客近三十人皆親舊及要勢所薦之士日
燕飲賓客為樂始嗣勲在蜀歲餘激賞庫所積錢至

七十餘萬德夫盡費之有合州人杜源者為蓬州守
坐上逆曦表為御史中丞所劾竄賀州報至德夫適
受謁即摘前知利州某前知重慶府某語之曰二君
頃在郡得毋例為此乎儻有之幸密以告獵當類奏
可無他慮不爾懼為人所持二客謝無之聞者傳以
為笑德夫有外姻厚載以入蜀成都稅官丹稜史某
征其稅八百緡德夫大怒欲按之史懼而不取德夫
怒未已賓客重為謝乃止有趙綱者為利路漕以婦

死擅歸所居遂寧之長江德夫素惡其人幕客以綱
擅出境請詰之德夫以綱嘗為宣司所薦不敢問其
幕客之輕銳者共逼之德夫不得已初問不報再問
以宣檄為解又持不可德夫曰已問矣恐傷宣司太
甚可止也德夫守蜀歲餘會宣撫司罷乃以安子文
為制置大使而德夫召去然其為人樂易臨民寬待
士有禮故蜀人安之惟識者以不能旌別淑慝為恨
李仲衍為成都提刑嘗面折德夫曰侍郎為南軒門

人今日所行視南軒豈不有愧德夫策不答仲衍嘗
為人言德夫事輒曰焉得剛云 嘉定四年七月詔
四川官吏嘗受偽命者毋得叙用 五年四月詔自
今告人從偽者並指事實誣告者坐之

癸丑降德音

於兩淮湖北京西被兵諸州降雜犯死罪囚釋流以
下湖北京西諸郡仍毋納今年租賦 尋又降德音
於西和階成鳳州

復大散關

四川忠義人收復 後二十日復為金人所取

已未方信孺使金

以奉使金國通謝國信所參議往金國議和是日發
行在

庚申宇文紹節權京湖宣撫使

知江陵府自兵部尚書除

丁卯召楊輔

赴行在奏事

侂冑既殛死

按侂冑死在仲冬距此時尚七月內因楊輔

劉師文追赴行在為侂冑死後事遂先著於此而不為標明年月蓋此書體例前後錯出往往如是楊

公輔劉公師文皆奉詔追楊公力辭劉公先至赤岸

草奏言蜀中盜賊羣聚皆有其故軍旅之內物情日

益猜阻惟早召安丙一日則有一日之安邊頭諸事

權付利東安撫劉甲足得商量循理而行峴首之除

章不及上而安公遂除制置大使又六年而後罷焉

吳玠為四川制置使

代楊輔也

戊辰錢象祖參知政事

己巳改興州為沔州

先是詔吳獵與宣撫司共議分興州都統司軍之半
屯於利州 五月庚子復置沔州副都統制以好義
為之仍分沔州都統司十軍隸兩都統節制

庚午贈楊震仲官

嘉其死節不受偽命也仍官其子一人

五月丁丑賞誅吳曦功

轉資犒賜之數略見二月乙亥誅吳曦下注

戊寅竄受偽命人張伸之等

用四川宣撫司奏特貸命除名編配二廣湖南諸州
不雨

己丑禱於天地宗廟社稷

辛卯楊巨源敗於長橋

與金兵戰為所敗

案宋元通鑑安丙誣巨源謀亂長
橋之役巨源方戰丙密遣彭輅收

送闍州獄未至殺之以自殪聞此但以自敗為文巨源傳亦然

赦天下

以太皇太后服藥故

太皇太后崩

謚曰成肅權攢於永阜陵后母儀三世正位凡三十有二年弟淵官至少傅保順軍節度使賜玉帶后崩遺命賜淵錢十萬緡金二千兩田十頃僦緡日十千馬

戊戌楊輔依舊四川制置使

召吳玠

喝犒畢赴行在奏事

辛丑李好義敗於秦州

案本傳好義欲乘勝徑取秦隴而安丙令但守故疆不得侵越

不言好義之敗

好義襲秦州敗而還

六月甲寅賞守襄陽功

己未李好義遇毒死

癸亥林拱辰使金

林仲虎副以通書官方信孺自軍前歸言金有和意也張巖之督視江淮軍馬也遣信孺往河南行省求和北帥布薩揆許納南使且禮遣之信孺既行揆復使人諭之曰已奏朝廷更得安宣撫與西元帥一書乃善侂冑以書遺安丙諭指安公難之久之乃作書如所云且餉以藥物縑幣西帥啟緘却餽而令鳳翔府路都統使完顏昱作書以來大略言當聽命於

行省而已時朝廷遣三使入北一通謝二告哀三賀

生辰通謝使者拱辰是也

案告哀使為富瑄
生辰使為劉彌正

金已遣

迓使來已過泗州矣復却回之曰皇帝聖旨南使中

惟李壁吳琚朱致知李大性四人言語可信當遣來

議事今所遣小使且還琚隆慈之弟子位至少師節

度使致知嘗以右司郎中出賀庚申正旦未還道除

司農少卿俄引年除直龍圖閣主管雲臺觀大性字

伯和南昌人嘗為戶部侍郎琚與致知時皆已死金

又欲朝廷割地損禮由是不諧云

癸酉安丙殺其參議官楊巨源

先是巨源擅殺孫忠銳於鳳州

案史安丙素惡忠銳令巨源殺之遂以忠

銳附偽聞於朝蓋以附偽誣忠銳又以擅殺忠銳誣巨源也

既而有長橋之敗前

一日執巨源以屬吏是夜遣將官樊世顯殺於大安

之舟中 吳禮部題鄧平仲小傳後隆山牟君成父

之父祖仕宋皆有列於朝君早侍左右凡典章故實

具能言之號稱博洽此其書鄧平仲及濟邸事以遺

曹士宏者蓋士宏以史事自任故屬之如此吳曦之誅實楊巨源結李好義舉義之功為丙輩媚忌掩沒今監丞衆仲跋語舉以為言當矣前代記曦之事詳者惟李心傳嘗讀其朝野雜記亦略於巨源近有續陳均宋編年者頗載巨源事而多舛錯雖能書安丙殺其參議官楊巨源而復以擅殺孫忠銳之罪歸之大概當時歸功於丙故其事不白惟俞文豹吹劍錄具載巨源本末併所撰詔書及丙與彭輅謀奪巨源

兵令樊世顯殺之於大安城下又言其妻子流離困苦狀使人憤惋蜀多義士編年亦並載平仲之志壯矣使年君不記世未必知也余疇昔好聽遺老談說見裨官野史有可備記述者輒不忍棄如俞氏所云皆錄藏于家今不能悉記姑誦其畧以附焉吁年君子不及識今不可復作矣吾儕晚出者亦且老後來

尚復有談此者乎良可慨也

案此跋非本書文蓋永樂大典採取附入

誅楊李二人功也安丙本曦黨其奏功抑二人而反以曦將王喜居首使王喜配好義誣巨源以謀亂宋

史巨源傳雖言丙奏巨源功第一而獎諭詔書並不
及巨源但補承事郎而王喜授節度其非事實可知
史于二人傳不明著其寃但微及丙之媚疾殘賊至
丙傳更無貶詞此書于丙亦微其詞是蹶頗得安楊
之曲直故仍附於此
吳禮部名師道元人

秋七月乙酉下罪己詔

以大水及飛蝗為災也詔曰朕德非類致天之災比
者郡邑間被大水加以飛蝗為孽永惟咎徵震悼于
衷二三大臣其助朕思正厥事以迪百工俾內無誕
謾私諛之風外無貪墨暴刻之政其有災傷當行賑

恤者具狀以聞毋得蒙蔽矧今兵戍久勞瘡痍未息
一念及此痛如朕躬疆場之吏尤當極力綏輯稱朕
閔卹元元之意焉

八月壬戌劉師文為四川宣撫使

以密劄除之命隨所在置司事訖奏

九月丁丑詔倣邊備

詔以和議未可就令諸大帥申倣邊備時通書官方
信孺自濠州歸自事於朝信孺言金人所欲五事韓

佗胄問其目信孺言一割兩淮二增歲幣三犒軍金
帛四索陷沒及歸正人五不敢言佗胄再三問之信
孺惟稱不敢佗胄厲聲曰若不言朝廷當有行遣信
孺徐曰欲太師首級耳佗胄大怒以穢語詈之於是
信孺坐擅以私覲物作大臣遺金人降三官臨江軍
居住 尋詔通謝使還行在命淮西漕臣章穎措置
雄淮軍

已邠召辛棄疾

仇胄復有用兵意遂除棄疾樞密院都承旨疾速赴
行在奏事會棄疾病死乃已

辛巳召張巖

日下前來奏事以督視久無功故也後十三日甲午
罷之

壬午貶方信孺

注見上

甲申減極邊官吏舉員

丁亥葉適罷

辛卯趙淳兼江淮制置使

以殿前副都指揮使兼代葉適也

辛丑王柟使金

自主管臨安府城南左廂公事差監登聞鼓院出使
冬十月乙巳蠲臨安紹興賦

降囚罪一等民緣攢官役者蠲其賦

丙辰以邊事詔諭軍民

詔曰朕寅奉基圖通遵祖武憂勤弗怠敢忘繼志之
誠寡昧自量尤謹交鄰之道屬邊臣之妄奏致兵隙
之遂開重困生靈久勤征役省躬自咎攬涕何言第
惟敵人陰誘曦賊計其納叛之日乃在交鋒之前是
則造端豈專在我況先捐泗上已得之地亟諭諸將
歛戍而還蓋為修好之階所謂不遠之復適傳來款
自我元戎庸告九廟之靈併嚴三使之選束裝於境
待報即行凡所要求率多聽許彌縫既至恟懼備殫

無非曲為於斯民詎意復乖於所約議稱謂而不度
彼已索壤地而擬越封陲規取貨財數踰千萬雖盟
好之當續念膏血之難腴茲敷露於腹心用申儆於
中外深惟暴露重痛死傷疆場耗於流離郡縣煩於
供億致汝於此皆朕之愆當知今日之師愧非得已
而應豈無忠義共振艱虞思祖宗三百年涵濡之恩
極南北億萬衆創殘之苦上下同力遐邇一心鑒既
徃之莫追幸方來之有濟嗚呼事雖過舉蓋猶繫於

綱常理貴反求況已形於悔艾凡我和戰視敵去來
各肩衛上之忠茂建保邦之績繁爾有衆體予至懷
自用兵以來蜀口江漢之民死於兵火者不可勝計
公私之力為之大屈而侂冑歸罪金人佳兵之意未
已國人憂之遂有去凶之議焉

十一月甲戌韓侂冑陳自強罷

御筆韓侂冑久任國柄粗鑿勤勞但輕信妄為輒啟
兵端使南北生靈枉罹凶害今敵勢叵測專以首謀

為言不令退避無以繼好息民可罷平章軍國事與
在外宮觀陳自强阿附充位不卹國事可罷右丞相
日下出國門

乙亥韓侂冑伏誅

先是金人既有縛送首議用兵賊臣之請侂冑怒復
欲用兵中外皆懼禮部侍郎史彌遠時兼資善堂翊
善乃建去凶之策其議甚秘人無知者久之得密旨
乃以告參政錢象祖李壁至是皇子榮王入奏遂有

此旨仍命殿前司中軍統制權主管本司公事夏震
選兵三百防護侂冑別選兵二百守其府門錢參政
欲奏審史侍郎夜往其府趣之李參政亦言恐事留
或泄乃已三日乙亥侂冑入朝至太廟前震呵止之
其從者皆散護聖步軍準備將夏挺以帳下親隨三
十四人擁侂冑輿以出中軍正將鄭發王斌引所部
三百執弓鎗刀斧護送至玉津園側殛殺之是日新
除右諫議林行可方請對宰執至漏舍自強語同列

曰大坡

案仇曹傳作大成

今日上殿俄而仇曹前驅至錢參

政彷徨不知所為既而震報仇曹已押出權吏書兼

給事陸峻工侍兼京尹趙善堅失色相與耳語同列

叱之錢參政探懷中堂帖授自强曰有旨丞相罷政

自强即上馬顧曰望二參政保全二參政赴延和殿

奏事遂以竄殛仇曹事牒報對境又令殿前司遣素

隊五百人赴省前彈壓 丙子制罷仇曹為醴泉觀

使丁丑責為和州團練副使郴州安置行中丞衛涇

章䟽也給事中雷孝友封還錄黃戊寅詔侂冑改送
英德府安置是日又詔侂冑除名勒停送吉陽軍安
置仍籍沒家財行司諫王居安章䟽也已邠臨安府
申侂冑已身故

案侂冑以乙亥殛死然未明正典刑故丙子後尚遞行責降而終以身故

為文蓋當時諱之也

史丞相之請除侂冑也惟一二執政近

臣知之前數日侂冑在都堂忽謂參政李壁曰聞永嘉人欲變此局面相公知否李疑事泄徐荅之曰那有此侂冑默然前一夕侂冑與其愛姬號滿頭花者

方飲酒周筠自外至曰事欲不善侂胄笑曰誰敢爾
筠再言不應懼而去詰朝遂坐殛夏震者本壁所薦
侂胄命攝殿巖後以擊侂胄之勞終於節度使 侂
胄之妻吳夫人者憲聖后姪女也蚤死無子侂胄既
貴四婢張王譚陳皆有寵累封至郡國夫人所謂四
夫人也每內宴往往宣押與妃嬪雜坐恃勢驕倨掖
庭皆惡之其下又有封恭人或安人者甚衆侂胄殛
死四人皆知不免盡取其珍寶瑰異之物擊碎曰無

為它人有也後二日言者論之乃詔四夫人以下悉
追毀告命放令自便既復以四人屬吏又二十有二
日獄成詔張福免王美憐各徒一年譚陳各杖一百
餘六十人令臨安府縱歸其家 侂冑用事十四年
威行宮省權震天下初以預聞內禪為己功竊取大
權中則大行竄逐以張其勢始則朝廷施設悉令稟
命後則託以臺諫大臣之薦盡取軍國之權決之於
己褒引奸邪分布要路陵悖聖傳以正學為偽學橫

誣元老以大忠為大逆私意既行凶燄日熾交通賂
遺奔走四方童奴濫授以節鉞嬖妾倨肆於掖庭創
鑿亭園震驚太廟之山燕樂語笑徹聞神御之所窮
奢極侈僭擬宮闈凡除擢要臣選用兵帥皆取決於
廝役蘇師旦之口已所欲為不復奏稟徑作御筆批
出軍事既興又置機速房於私第應御前金字牌悉
留其家凡所遣發未嘗關白方其出入禁庭了無顧
忌雖孝宗皇帝疇昔燕坐思政之所亦偃然冒居老

宮人見之為之感涕歲時錫燕內庭親王戚里預焉
可也師旦刑餘賤人乃邀至其間更相酬酢褻瀆名
分一至於此勢焰熏灼視公卿如奴僕宰相以下匍
匐趨走一則恩王二則恩王甚者尊之以聖呼以我
王除太師麻詞有聖之清聖之和等語除平章麻詞
有超羣倫洞聖域等語高文虎之子似孫為秘書郎
因其誕日獻詩九章每章用一錫字侂冑當之不辭
辛棄疾因壽詞贊其用兵則用司馬昭假黃鉞異姓

真王故事由是人疑其有異圖自知積失人心中外
皆怨乃為始禍之計蓄無君之心謀動干戈圖危宗
社盛夏出師沿邊赤子骨肉流離肝腦塗地死於非
命不知其幾千萬人與逆曦結為死黨假之節鉞授
以全蜀兵權曦之叛逆誰實使之方曦之叛蜀人盛
傳金封侂冑為吳王又謂侂冑欲與曦分吳蜀之地
而王之有司簿錄其家多有乘輿服御如居用木圍
寢用龍衾坐用升龍牙床飾以真紅絛結如此等類

意欲何為稽其稔惡雖寸斬之亦不足以謝天下殛
死之日京都士女歌舞於市方其盛時鋤害善類不
遺餘力及其敗也黨錮諸賢無不錄用褒賚九原哀
榮千古雖暫為所抑要之以久公論未嘗不伸也而
識者以中間葉適吳獵之出為恨云

參政錢象祖兼知樞密院事李壁兼同知樞密院事

上欲擢史侍郎樞密固辭乃命錢參政兼知院李參
政兼同知是日禮部尚書衛涇除御史中丞吏部侍

郎雷孝友除給事中著作王居安除左司諫晚召直

院章良能鎖學士院丙子侂冑自強並罷為醴泉觀

使

按時隱侂冑之誅故既死而猶行斥逐之命此條已見前目內此亦複出

李參政進呈

改自強提舉洞霄宮特進在外無充觀使者丁丑殿

司三將各進五官賜銀百兩士卒官賞有差而夏震

再遷福州觀察使主管殿前司公事

以罷逐侂冑意詔天下

詔曰朕德不明信任非人韓侂冑懷奸擅朝威福自

已劫制天下首開兵端以致兩國生靈肝腦塗地興
言及此痛切於衷矧復怙惡罔悛負國彌甚疎忌忠
讜廢公徇私氣焰所加道路以目今邊戍未解怨毒
孔滋凡百縉紳泊於將士當念前日過舉皆侂冑專
恣欺罔非朕本心今既遷逐一正權綱各思勉旃為
國宣力飭兵謹備以圖休息稱朕意焉

丁丑貶竄陳自強

追三官永州居住行衛涇章䟽也雷孝友封還錄黃

戊寅詔自強責授武泰軍節度副使依舊永州居住
是日又詔送韶州安置行王居安章䟽也四月丁巳
自強責詞過門下給事倪思不書黃戊午自強再責
復州團練副使雷州安置仍籍沒家財六月癸酉陳
自強卒於廣州詔許歸葬

已卯蘇師旦伏誅

前一日丁丑師旦杖脊刺配吉陽軍行衛涇章䟽也
已卯給事又論師旦當正典刑詔處斬令廣東憲臣

莅其刑妻子編置 有司簿錄仇冑家得師旦所與
書云步軍司人少殿前司人多今欲殿前司人只與
步軍司相等却撥殿前司所多之人別立一軍使信
臣掌之信臣師旦自謂也故處以極典

配周筠

決脊刺配嶺外

詔求言

詔曰奸臣擅朝畏人議已專事壅蔽下情不通政理

多闕今既竄殛當首開言路以來忠讜中外百僚其
各條具所見以聞

史彌遠除禮部尚書

辛巳竄鄧友龍

再奪五官南雄州安置尋又除名勒停循州安置

以邱密知建康府

自通奉大夫提舉臨安府洞霄宮除資政殿學士留

守

乙酉置御前忠銳軍

丙戌衛湮簽書樞密院事兼參知政事

丁亥詔立皇太子

詔曰古先哲后丕建元良祖宗以來厥有彝典朕獲承至尊休德十有四載而主鬯尚虛非所以重大器正大本也皇子曦天姿英粹學問日充望足繫於人心言有裨於治道蔽自朕志處以儲闈用衍萬世無疆之緒立為皇太子改名懋

李壁罷

初命除職與郡後二日又復降兩官送撫州居住行
殿中侍御史章䟽也

戊子竄郭倬郭僎

案本紀梅州安置乃郭倪郭倬閏
禧二年已誅於鎮江此本疑有悞

治喪師之罪也倬梅州僎連州並除名安置籍其家

癸巳貶張巖

奪二官徽州居住

己亥赦天下

以立皇太子也

十二月乙巳邱密為江淮制置大使

案本紀在癸卯

時趙淳已為江淮制置使故加大字以別之罷山東京東安撫司尋又罷京西北路招撫司

許奕使金

吳衡副之

乙巳太白晝見

庚戌貶許及之薛叔似

及之奪二官泉州居住叔似奪三官福州居住

案本紀叔

似亦奪

二官

竄皇甫斌

再奪五官英德府安置

癸丑金人陷隨州

辛酉錢象祖為右丞相

兼樞密使

衛涇雷孝友並參知政事林大中簽書樞密院事

甲子楊次山除使相

次山后之兄也以太尉除開府儀同三司賜玉帶

乙丑史彌遠同知樞密院事

丙寅贈呂祖儉官

朝奉郎直秘閣官其子一人

丁卯詔改明年元

是月四川宣撫司科對糴米

時宣撫副使安丙也檄東西路漕各糴米二十萬斛

夔路漕司十萬斛制置司抱認於成都府糴十萬斛
並遣官運送沔州制司屬官見之皆忿曰我比司也
乃為若市米邪端明楊輔曰理不可拒第徐為之圖
可耳時宣撫司方科民戶對糴米乃報以抱認六萬
斛其半本府坐倉其半九縣對糴既而楊公召歸事
亦遂已對糴米者紹興初有之休兵後罷去蓋每民
戶稅產一石則科糴一石故謂之對糴焉

是歲以建康鎮江三務場徑隸提領官

四提轄謂權貨務都茶場雜買務雜賣場文思院左
藏東西庫是也權貨務場掌醴茗香礬鈔引之政令
紹興初沿宣政舊例置提領官率以故省吏為之後
乃改用士人行在建康鎮江三務場歲入凡二千四
百萬緡建康一千二百萬行在八百萬鎮江四百萬
皆以都司提領不係戶部之經費而在建康鎮江者
分屬總領所焉開禧末以總所侵用儲積錢始令徑
隸提領官不屬總所

四川初行小會子

尋廢不用 東南會子有四品自一貫至二百蓋便於轉用也川錢引則分一貫及五百而已丁卯歲陳咸以用不足始創小會子楊輔為制帥深不樂之故四川皆不用吳獵代鎮蜀與陳咸厚下令官民悉許流轉然州縣務場賦輸悉不肯受由是不能行後但以其五萬緡收兌舊引於劍外諸州已而亦廢是時宣撫司又為金銀會子後亦不行

欽定四庫全書

史部

兩朝綱目備考卷十一

詳校官編修臣謝振定

侍讀臣孫球覆勘

謄錄監生臣董誠

謄錄監生臣俞光豫

欽定四庫全書

兩朝綱目備考卷十一

寧宗

嘉定元年

戊辰春正月戊寅臺諫請梟韓侂冑

右諫議大夫葉時殿中侍御史黃疇若監察御史章
燮余崇龜等上言侂冑專政無君僭上不道乞梟其
首領置之淮甸積屍叢冢之間以謝天下詔答以已
重施行辛巳章再上御筆以未欲輕從答之

金史紀事本末
卷十一
詔求言

案本紀求言之詔在辛巳

詔曰朕以眇躬獲遵洪業所期恭已治可致於無為
乃昧知人失浸成於偏信自奸臣之怙勢畏公議之
靡容屏蔽聰明排斥忠直利害莫從而上達威福自
得以下移逮茲更化之初亟出求言之令脩再踰於
月律猶罕見於奏封豈習俗相仍激昂者寡抑精誠
弗至顧忌者多厥今百度未釐二邊未靖人才乏而
未究搜羅之術民力困而未明惠養之方救此弊端

寧無良策乃若箴規主失指摘奸邪人所難言朕皆
樂聽儻有裨於事實詎敢吝於褒章其或過差務從
寬假凡我縉紳之彥暨于芻蕘之微久鬱之懷諒欣
聞於申命竭誠以告庶共底於丕平

乙酉集議韓侂冑元首事

先是壬午監登聞鼓院王柟自河南通書回持金人
行省牒赴三省樞密院求元首詔侍從兩省臺諫集
議以聞丙戌臺諫又以為請詔三省樞密院詳議上

壬辰史彌遠知樞密院事

許奕使金

以起居郎充通謝使吳衡副之

二月戊申追復趙汝愚職名

案戊申在二月原本脫去今添入

復觀文殿大學士謚曰忠定

詔改正韓侂冑事迹

命史官自紹熙以來改正以其冒定策功也

壬子賑流民

詔臨安府賑濟

甲寅雪

戊午再竄程松

責授果州團練副使賓州安置

甲子罷劉德秀遺表贈官

是月柳州黑風峒寇為亂

黑風峒者在邾吉之間而地屬桂陽縣有羅孟二者
名世傳其首首也至是世傳出掠省地已而受招詔

補承節郎世傳之犯省地也郴州舉人李元礪嘗助
官軍擊賊元礪曾口人以武斷鄉曲羣盜皆畏之比
世傳受招論功行賞而元礪不及遂去為盜盜推為
帥時江湖方艱食饑民及汰去之兵多附之遂至數
萬

三月戊子下戒飭詔

詔曰朕臨御以來仰遵累朝恭儉之規菲食卑宮躬
行以移風俗而志勤道遠觀感未孚况姦倖弄權故

相同惡上下交利賄賂公行監司郡守並相倣倣貪婪無厭狼籍已甚朕方厲精更始申加訓飭以倣有位繼自今各務精白一心以承至意其有緣公濟私尚為故態必罰無赦尚其戒哉

復秦檜王爵贈諡

以復議講和故也

辛卯詔梟韓侂冑首於兩淮

前二日王柟自軍前再還行在議以韓侂冑函首易

淮陝侵地翌日詔侍從及兩省臺諫赴都堂詳議限
一日聞奏於是議者皆言和議重事待此而決則姦
凶已斃之首又何足惜是日有旨依奏遂詔臨安府
遣東南第三副將尹明斲仇冑棺取其首送江淮制
置大使司壬辰降黃榜于臨安府兩淮荆襄四川曉
諭癸巳宰執咨目諭諸路安撫制置司以函首事

丁酉謝奕使金

以起居郎克通謝使

汰鎮淮軍

始淮南兩漕司招輯邊民號鎮淮軍多至十餘萬人日給錢米悉視効用所費甚廣既不黥淫漫無統紀久之廩給不繼公肆剽劫嘉定改元邱寔復為江淮大使朝廷慮鎮淮或生它變遣宗正丞常楮叔度奉使措置且就令商度寔乃先隨雄淮所屯分隸遂州守臣節制尋奏以淮東人數少令帥漕任責揀汰除願歸農外僅存八十餘人刺其半充効用以補鎮江

大軍及武鋒軍闕額淮西人頗衆合六萬餘人乃委制司屬官陳師文同漕臣張頴揀刺二萬六十餘人充御前定武軍分為六軍各置統制自是月省錢二十八萬緡米三萬四千餘石而定武亦成軍伍淮西頗賴其力焉 此事不得其月日姑附于此

是春皇子埊生

閏四月癸未薨追封肅王謚曰冲靖 先是詔吏部太常寺討論贈官典故吏部引國朝會要元豐四年

鄆王侂政和三年漢王椿故事贈太師尚書令追封
肅王倪思時以禮部尚書兼給事中引治平二年王
珪等議皇子以師傅名官於義未安乞止贈尚書令
詔從之 李心傳曰吏部太常固失之而倪正父所
奏亦未盡也乾道中省三省長官易以左右丞相則
所謂尚書令者蓋無此名矣乾道三年孝宗少子恪
贈淮康軍節度使開府儀同三司追封邵王此近事
且最為得體而議禮者皆不及之蓋弗深考耳三年

十一月皇子復有維垣之贈給事鄒應龍言子為父師於理不順然前是諸皇子或已贈太師矣應龍俄以親老求去遂除次對守泉州云

利州兵老小喧闐

關外諸軍月糧有支正色者有支估錢者是月王喜為沔州都統制以糴貴糧之下令正色米每石以二斗坐倉於是總領所乃優潤估錢予之謂如支天字殿則按舊籍收糴之時每石六引即於上加搭二分

作七引以二分為優潤其實市直乃十餘千一斛之
錢僅能糴其半利州軍士方出戍其家屬在營者皆
怒二月七日南倉當支糧未及畢衆共訴于統領官
王興祖曰汝自見總領白之於是突入總領所近千
人總領陳咸方謁客未還其屬官皆遯去無與酬應
者衆益忿適總領所修解舍衆共取椽桷數百執之
其一人陞廳事取更鼓擊之遂徑趨宅堂咸之家人
悉登城以去匿會節樓衆又逐之有茶酒卒以瓦石

自上擲傷數十人衆乃止咸聞變渡江入西倉興祖
隨往白之然後入城彈壓衆始散去宣撫司聞之遣
沔州中軍統制官朱邦寧來究其事既而以其方出
戍不敢治但誅擊鼓者一人又有墁匠一人導之以
入於寢所得其刀與一屨亦斬之王喜素愛興祖故
但降為隊將尋以招成州亂兵復故職事聞朝廷為
降詔戒諭諸軍

夏四月丙辰詔科別群臣奏疏

詔後省科別可行者以聞

贈彭龜年職名

實謨閣直學士

落李沐實謨閣學士

戊午真德秀論和議

德秀時為太學博士上書曰竊惟權臣用事妄開兵
端南北生靈均被其毒陛下為之旰食焦勞者二年
於茲矣天啟睿謀迄殄元惡尋盟繼好休息有期豈

非天下之福哉而臣區區愚慮竊謂為國者當示人以難犯之意不可示人以易窺之形昔春秋時晉師入齊齊使國佐求盟於晉其勢亟矣一聞齊之封內盡東其畝之言雖僨軍之餘不肯苟從以紓一旦之禍蓋敵國之相與有以折其謀則為和也易有以啟其嫚則為和也難況敵人變詐百出又非可以中國常理待之側聞日者小行人之遣也金人欲多歲幣之數而吾亦曰可增金人欲得奸人之首而吾亦曰

可與至於往來之稱謂擣軍之金帛根括歸朝流徙
之民承命惟謹曾無留難竊揆謀國之意不過以樂
天保民為心幸和好之亟就耳獨不思金人得以聞
吾之情而滋慢我之意乎雖然此既往之咎耳所以
圖制方來者猶可謹其初也蓋古者敵國通和有養
其力以待可為之機者越之事吳是也有聽命於敵
以圖苟安之計者六國之事秦是也今日之尋盟於
金臣不知姑欲養其事力而待可為之機乎抑將聽

命於敵而圖苟安之計乎勾踐之行成於吳也蓋忍耻以志仇讎之復而非倚和以自固也是以二十年間蚤朝晏罷卧薪嘗膽未嘗一日忘會稽之耻故雖詘辱一時迄能伸其志於異日若夫六國則不然其求和於秦也盖委國以為仇讎之役而非用權以求濟也故朝割地以賂秦則暮棄謀臣之言夕遣質以入秦則旦絕鄰國之援撤防弛備冀秦之矜已而不加兵奚異委肉虎狼而幸其弗食也夫是以六國之

地卒歸於秦豈秦之力能亡是六國哉六國實自亡耳今日而知是則當以越之事為法而以六國之事為戒可也抑臣聞之善謀者不觀敵人之動靜而觀吾政之修否元祐初用司馬光為相盡更王安石弊法契丹聞之以勿生事戒其邊吏今日號為更化矣而敵之桀驁亡異前日毋亦我之所為尚有可思者乎故臣妄論今日之事必吾無以取輕於敵而後和可成必有以深服其心而後和可固臣觀昨者竄殛

柄臣之始不惟四方萬里咸服英斷而敵國亦竦然
易視矣誠使剛健不息之誠愈篤於初振厲有為之
志益加於舊則國勢日強敵自退聽奈何朝綱方整
而紛紊之漸已萌政事方修而懈弛之形已露正人
雖進志未獲伸言路雖開忠罕見用我之更化者僅
如此其能使敵情之畏服哉況夫彼之待我者方驕
我之恃和者太重一介行李曾未越境而動色相慶
若無事然臣恐盟好既成志氣愈惰宴安鴟毒之禍

作浮淫冗蠹之事興彼方資吾歲賂以厚其力乘吾
不備以長其謀加之數年聲勢寢盛然後發難從之
請挑必爭之端而吾徬徨四顧將無以應之此長慮
遠識之士所為寒心者也臣願陛下以通和講好為
權宜以脩德行政為實務君臣之間朝夕儆戒于敵
情之難保禍亂之無日蒐討軍實申儆邊防凜然若
敵師之將至如是而國勢不張外虞不弭者未之有
也

閏四月壬申雨雹

旱

癸未詔大理三衙臨安府及諸路闕雨州縣決繫囚
釋杖以下辛卯禱于天地宗廟社稷癸巳減常膳乙
未蠲兩浙闕雨州縣貧民逋賦復命大理三衙臨安
府兩浙州縣決繫囚丙申幸太乙宮明慶寺禱雨
甲申詔皇太子侍立朝殿

詔曰朕更化厲精祇若古訓為萬世長策先圖其大

者皇太子溫文粹美學問夙成欲使與聞國論通練
事幾以增茂儲德二三大臣各兼師傅賓僚用伸羽
翼之助其相與叶心輔導成朕愛子之義以綿我家
無疆之慶是惟休哉自今每遇視事可令皇太子侍
立宰執赴資善堂會議 乙酉錢象祖兼太子太傅
衛涇雷孝友林大中並兼太子賓客 是月丁亥皇
太子出居東宮

丁酉詔求言

旱故也詔曰朕惟祖宗傳序之重祇懼靡遑而自去
歲以來蝗蝻為灾冬既無雪春又不雨夏且半矣祈
禱不應天灾流行固亦有之在於今茲關繫實重邊
鄙甫定流徙未復漕運不至米價日增苟失歲事何
以保邦傳不云乎屋漏在上知之在下其播告中外
凡朕躬不逮朝政闕失田里愁嘆軍民疾苦盡言無
隱朕將採而用之無小無大惟既乃心稱朕意焉

五月辛酉親試舉人

賜禮部奏名進士鄭自成等四百二十有六人及第
出身有差

甲子太白經天

蝗

乙丑減常膳丁卯詔侍從臺諫條上闕政監司守令
條上民間利害以聞六月乙酉禱於天地社稷七月
壬戌詔三省條上寬卹未盡之事八月戊辰出豐儲
倉米賑貧民

六月庚午金人歸大散關辛未歸濠州

又歸隔芽關

乙亥衛涇罷

行御史中丞章䟽也

甲申林大中薨

以簽書樞密事薨于位

丙戌詔舉邊守

詔侍從兩省臺諫舉沿邊守臣

辛卯史彌遠兼參知政事

秋七月辛丑賜呂祖泰官

先是祖泰以上書忤韓侂冑配欽州牢城至是改正過名特補上州文學尋改授迪功郎監潭州南岳廟
癸丑邱宙同知樞密院事

甲寅許奕歸自金

以通謝使回是日入國門

八月辛未邱宙薨

于江陰之里第

甲戌議楮幣

侍從臺諫兩省詳議會子折閱利害 自曾從龍為
版書欲急見理財之效始與提領會子庫官陳彌祚
共議依川錢引例立界每界一千萬緡兩界相並行
之久矣其後每界增為千八百萬緡至第七界又增
為二千三百二十三萬緡開禧用兵又依四川例亦
以三界通行而第十三界累增至四千七百五十八

萬九百餘緡民間折閱滋甚

辛巳婁機同知樞密院事樓鑰簽書樞密院事

丙戌詔考訂民間利害

詔禮部侍郎許奕起居舍人曾從龍考訂監司守令
所條民間利害擇可行者以聞其未條上者趣之

甲午賑江淮流民

出米二十萬石賑糶尋又出安邊所錢一百萬緡命
江淮制置大使司糴米賑饑民

九月己未和議成

先是金遣諭成使完顏侃喬宇來辛丑入見至是以和議成諭天下

乙丑大風

降德音

于沿邊諸州

是秋背嵬軍謀為變不克

沔州背嵬軍謀以九月二十八日安資政生祠落成

之日舉事已結連劍利諸軍矣前一夕安公家人夢
廳事下有坐甲者數百是日安公心忽動俄有告變
者捕為首八人誅之隆慶府後軍統制官張林知其
謀命憲臣宋正仲鞠實獄成當死詔以其有誅叛之
勞奪防禦使除名嶺南羈管云

冬十月丙子錢象祖為左丞相史彌遠為右丞相雷孝
友知樞密院事兼參知政事婁機參知政事樓鑰同知
樞密院事

己卯褒錄慶元上書楊宏中等六人

宏中徐鉉張衡各循一資周端朝林仲麟各免文解
蔣傳已亡詔以東帛賜其家

辛巳加配蔡璉

吏部尚書兼翰林學士樓鑰等狀看詳到朝散郎監
都進奏院趙崇憲等奏乞辨雪父汝愚讒誣等事一
疏內直省官蔡璉最為可誅方汝愚與彥逾謀達意
於郭果是時蔡璉從旁密聽本欲漏泄幾害大事在

法當誅正以危疑之時不欲盡行姑從決配以從輕
典後乃自配所逃入都城投匭誣告幾致興羅織之
獄陷害忠良當時全臺曾入章疏於是彭龜年追三
官勒停魯三聘追兩官蔡璉誣罔尤不可恕欲乞朝
廷將蔡璉坐以逃入都城之罪更與加配奉聖旨依
看詳到施行照得蔡璉於紹熙五年八月內准指揮
特決脊杖二十刺面配千里外撫州牢城收管於慶
元五年二月內放逐便於嘉定元年四月內與降等

比換進武副尉吏部供到蔡璉因磨勘現轉承信郎
監江陰軍江陰縣令節犒賞酒庫奉聖旨蔡璉追毀
出身文字除名勒停加配贛州牢城

十一月戊戌四川収充九十界錢引

先是四川錢引以二年為界每界書放之數止於一
百二十五萬崇寧後陝西邊事起泛印增多而引法
壞大觀間盡罷之仍詔以天聖書放之數為準建炎
初張魏公浚出使復以便宜增印自後因仍不已至

嘉泰末兩界書放凡五千三百餘萬緡通三界所書
放視天聖祖額至六十四倍嘉定初每緡止直鐵錢
四百已下議者患之總領財賦陳咸乃與僚屬議出
庫莞金銀度牒與民收回半界金每兩直六十緡銀
每兩六緡二百度牒每道一千二百緡度庫莞所藏
可直一千三百萬議論凡數月至是忽行下諸州聽
民間以舊引輸官課及赴利州市金銀期以歲終官
司毋得受榜出民間大驚先是總領所歲受諸州縣

金銀例多虧下其補虧之數乃以錢引折納另項收
支而庫筭金銀虧下如故民間頗知其事又四川諸
州去總領所遠者至千數百里而期限已迫往來或
不及且受給之際吏緣為姦折閱已甚於是單丁弱
客皆不敢行一引之直僅售百錢咨嗟怨泣其聲載
道後旬日制置使吳玠知之乃揭榜除收兌一千三
百萬引外其餘三界依舊通行使用又檄總領所分
取金銀就成都置場收兌舊引民心稍定時宣撫司

方與總領所比故移書東南以為獵沮壞其事論者亦但謂錢幣專屬計臺制司無所預繇是不直吳獵云

庚子四川初行當五錢

案本紀四川行當五錢在十二月庚午

時陳咸總領財賦患四川錢引增多乃即利州鑄大錢以權其弊三年夏制置大使司欲盡舊引乃又鑄於邛州焉利州紹興監錢以聖宋重寶為文其背鑄利一二字又篆五字邛州惠民監錢以嘉定重寶四

字為文其背鑄西貳二字又篆五字兩監共鑄三十萬貫其料例並同當三錢時議者恐其利厚盜鑄者多而總領所方惠引直之低則曰縱有盜鑄錢輕則引重是吾欲也方錢之未行也眉人有里居待次者又欲創一監於眉州論者以為丹稜雖產鐵歲額不多而本郡又無薪炭眉山之人亦以為不便上下騷然數月乃罷由是止鑄於利印二監焉

戊午史彌遠去位

丁母喪也癸亥皇太子請賜彌遠第于行在令就第
持服許之彌遠辭第亦許之 明年二月壬辰遣內
侍趣彌遠還行在賜第

乙丑李大用謀為變不克

大用利州忠義人也初大用與其徒結集屯駐諸軍
欲以其日舉事先縱火焚倉庫然後殺總領劫掠財
賦又殺轉運判官及兩統制據城為變部分已定其
徒趙吉懼事不濟詣總領陳咸告之捕得大用十二

月戊辰也即教場杖殺之其徒死者八人賞吉錢千緡送蓬州養老吉行至葭萌縣大用之黨追殺之裂其屍棄之於道取其錢而去始大用之謀變家子欽時為總領所主管文字前一夕本所幹辦公事楊君玉來見坐定屏人探囊中一頭巾示子欽曰軍中有人謀變以此為號知之否子欽問如何曰以巾帶結于頤下者無患不然必不免子欽笑曰安有是事索酒飲之令去翌日子欽以語節制軍馬侯頤頤亦未

信子欽曰雖然不可不備第令人審察之勿張皇也
頤乃遣左右親信者物色其事會大用亦疑事泄乃
詣總領所自陳總領陳咸詰之大用曰某河池人始
破產萬緡從軍程宣撫授以忠義統領官意謂功名
可以立致不意朝廷罷軍汰遣某輩某僅得支犒二
十緡欲歸則無家欲留則無食自度不免一死計出
無聊乃至於是咸復問汝將何為曰欲殺監司守將
上閉潭毒嶺下閉劍門關自立為利王姑逭歲月耳

咸不俟其言畢命引之退及對吏自通所結連之士
北自三泉南抵綿劍其數甚衆咸命杖殺之不敢竟
也子欽嘗見具獄宜得其詳子欽又言宣撫司初令
川路造麵碁子至軍前不果用遣戍卒負之以歸卒
多盜食者總領所命以豁見糧士洵洵且為變子欽
以白咸盡捐之乃止事在開禧三年六月

丙寅錢象祖罷

案本紀錢象祖罷在戊辰

以觀文殿大學士判福州行監察御史章疏也

貶李沐

再奪三官信州居住

己卯黎州蠻蓄卜寇邊

沉黎自慶元乙卯以後無邊事者且十年至是彌羌蓄卜忽自惡水渡河入寇破州之碉子寨邊事自是再起先是蓄卜之弟悶已至三衝為人所殺部將趙鼎總轄官魏大受懼生事脅寨之土丁以骨價錢三千三百引償之時紹熙五年也有白水村者青羌往

來渡頭也其民舊與青羌交通慶元元年郡徙之安
靜寨青羌不以為便迄還之白水時開禧已二年矣
既而蓄卜又言大受嘗以袍印許之而不獲欲與青
羌偕往邛部川

案宋史作邛部州

假道女兒城以入寇寨言

于州乞以財帛遺都王母令假道守臣楊伯昌從之

案宋史守臣楊子謨以貴遺其都王母俾母假道

開禧三年二月六日壬子

也今年秋蓄卜遂以兵至三村總轄官董忠顯連告
急伯昌命嚴兵待之俄伯昌召去朝奉郎趙公庠代

為守聞羌人且至遣禁兵八十偕土丁往拒之兵至
茆坪而蓄卜已渡河軍丁迎敵不勝庚辰攻茆坪寨
官軍射退之遂掠三松蠶砂橫山三增白羊諸村殺
人民掠財貨蓄卜又進據如山而安靜良溪茆坪谷
堆諸寨皆為所隔公庀亟遣西兵正將黨燾案宋史
作黨壽以所部七十人及土丁俱往策應燾輕敵徑進癸未
戰于如山官軍失利義勇隊官二人戰沒西兵死者
四十人土丁六人郡又盡調西兵禁兵之未發者命

興化府後軍統領王光世將之以行是日羌人自茆坪寨下以皮船載生兵渡河寨官李茂引兵至河際射之一舟八人俱溺光世以羌人勢盛憚之留屯三衝不敢進羌人焚掠既盡戊子渡河南歸光世乃偽走捷旗稱會合兵丁趕逐羌賊道路已通時並河諸村生業既無遺矣制置使吳玠纔聞之庾寅遣義勇軍統領張師古以所部二百人赴州捍禦師古至則屯三衝而光世進屯安靜寨時邊報不一而在城之

兵調發既盡乃募強壯三百人號曰敢勇俾往邊頭
應援命軍事推官程伯雄充軍正統之以行伯雄丹
稜人也茆坪寨與邛部川女兒城隔河為境伯昌之
在黎也蠻地饑荒女兒城崔太者有請伯昌歲以米
十五斛贍之公庀至州靳而不予女兒城蠻因以藉
口乃借蓄卜路使之入寇既而諸司聞其事復命予
米如故然無及矣

是歲置提領拘權安邊錢物所

案本紀在閏四月辛未
又黃疇若傳拘權作拘

催

時甫廢國用司而低胄及諸閹省吏之家貲財皆已
簿錄黃疇若為殿中侍御史請初此名遂命與戶部
侍郎沈詵同領其事即御史臺置局又以宰屬一員
同領仍許疇若不拘常例到堂疇若等請卿監一員
提領安邊庫朝士二員為拘權官仍揭榜募人言拘
權事許之其後會其入歲得七十萬緡專充金人所
增歲幣其田宅契券皆藏之御史臺庫命臺官一員

典領局罷疇若已下皆進官

金主璟卒允濟立

璟以淳熙十六年立，在位二十年，無子。而雍之諸子，惟允濟在。故立之。雍即葛王裒也。淳熙元年，更名雍。

